

清

史

稿

清史稿

列傳一百二十

五岱

五福

海祿

成德

馬彪

常青

官達色

滿洲
尼什哈
圖達

敖成

圖欽保

木塔爾

岱森保

翁果爾海

珠爾杭阿

哲森保

五岱瓜爾佳氏黑龍江人乾隆十八年命隸滿洲正黃旗初以前鋒從征準噶爾授三等侍衛賜墨爾根巴圖魯名號戰葉爾羌復邊二等侍衛霍罕使者至命往宣諭授正黃旗漢軍副都統賜騎都尉世職三十六年從將軍溫福討金川授參贊大臣攻巴朗拉克之授正黃旗蒙古都統京旗目吉林黑龍江諸部人爲烏拉齊鄙之不與爲伍溫福以是輕五岱五岱密疏言溫福在軍好安逸

不親督戰自以爲是寒將士之心溫福亦劾五岱剛愎自用自成都至軍途中奪驛馬騷擾方攻巴朗拉縱營兵驚退五岱不能禁詐言被創昏暈上命豐昇額色布騰巴勒珠爾詣軍中按治色布騰巴勒珠爾等疏言鞠五岱俱不承請奪其職留軍前自効上責色布騰巴勒珠爾等所論列不得要領復疏言溫福輕五岱致起釁溫福疏辨謂五岱與色布騰巴勒珠爾朋比謀傾陷上命色布騰巴勒珠爾等逮五岱詣熱河行在是時尚書福隆安奉使如四川疏言五岱無奪驛馬及攻巴朗拉詐言被創事色布騰巴勒珠爾亦未嘗袒五岱五岱至熱河軍機大臣廷鞠成伊犁居數月授藍翎侍衛命從阿桂出南路聽差遣阿桂令率士兵赴美諾明郭宗諸地相機夾擊尋授頭等侍衛木果木師潰阿桂駐宜喜命五岱爲領隊侍衛率貴州兵防後路阿桂爲定西將軍授五岱正藍旗蒙古副都統復爲參贊大臣從副將軍豐昇額自丹壩進攻凱立葉山峻未深入上命豐昇額佐阿桂合軍進而以五岱駐凱立葉牽賊勢賊屢來攻屢擊敗之五岱疏言軍中護軍校等缺當擇應升人員請上命上以參贊佐將軍治

軍事不得自專責五岱非是阿桂豐仲額自日爾巴當噶進攻五岱自凱立葉督兵夾擊進逼勒烏圍阿桂令五岱移駐日則了口尋率兵協攻珠寨及噶朗噶各寨師攻勒烏圍五岱率所部自東北入合攻克之金川平圖形紫光閣列後五十功臣出爲塔爾巴哈台領隊大臣四十九年自塔爾巴哈台詣京師至蘭州聞石峯堡回爲亂請從軍上諭陝甘總督李侍堯以五岱嘗從征金川知軍事令率兵進攻侍堯令偕副都統永安提督剛塔討賊自馬家堡逐賊至鹿鹿山大霧駐軍數日調賊出後山分軍捕治命署固原提督戰伏羌城外殺賊三百餘賊遁入山遣兵搜捕俘二百三十餘復逐賊至秦安縣擬進攻底店上令尙書福康安視師五岱從克底店進攻石峯堡率兵搜捕黑屹塔白楊嶺餘匪毀牀子灘禮拜寺回亂平上以五岱自塔爾巴哈台班滿還京道聞回亂自請從軍福康安未至轉戰擊賊奮勉予騎都尉世職尋擢鑲藍旗蒙古都統充上書房總譜達授領侍衛內大臣卒

五福富察氏滿洲鑲白旗人自世襲佐領累遷四川雜州協副將乾隆三十五

年小金川土司澤旺與鄂克什土司色達克拉搆兵五福請於總督阿爾泰檄澤旺責使服罪澤旺子僧格桑尤桀鴛漸侵明正土司乃令五福將五百人屯梭磨界樸頭擺松潘鎮總兵如美諾護糧道小金川平借松茂道查禮按行邊徼屯練及新附汗牛十四寨時僧格桑竄大金川大金川土司索諾木與同爲亂上慮兩酋逃往鄂羅克命五福駐丹壩丹瑪往鄂羅克道所必經也賊襲攻底木達及大板陷師自登春入五福自後路會攻尋請以副將西德布率兵還丹壩而躬巡梭磨土婦卓爾瑪初附加以駕馭上命五福事畢仍還屯丹瑪五福旋自丹瑪進攻穆爾津山再戰陟其岡燬賊碉敗援賊師進攻五福以三百六十人爲應令官兵作攻撲狀綴賊士兵伏作固頂水卡旁賊至伏發殪其頭人遂進攻山半賊碉五福督兵斫碉門殺賊將軍阿桂等師克格魯克古了口將達丹壩五福隔山見師至卽督兵攻普籠籠瑪讓諸碉同時盡燬於作固頂以下傍水設營卡師進攻勒烏圍五福自陡烏當噶夾攻斃賊甚衆進攻榮噶爾博燬賊碉一師屯巴克圖仰木山巔五福克薩木卡爾山下諸碉卡與大軍

會自達烏達圍進攻五福同總兵常祿保等爲應既克黃草坪賊自山後出五福夾擊敗之師自奔布魯木進攻爲三隊五福與副都統烏什哈達率第三隊圍賊碉賊越碉竄與第一二隊合至西里正寨賊潰遁分攻瓦爾占舍勒固租魯夜移礮轟燬之進攻薩爾歪賊寨復爲三隊五福與都統海蘭察自中路進賊棄寨竄復繞出寨後殲賊甚衆賊寨皆下金川平圍形紫光閣列後五十功臣師旣還以兩金川地勢寥闊命五福將三千人屯美諾尋擢廣西提督卒海祿齊普齊特氏蒙古正藍旗人以前鋒從征伊犁定邊右副將軍兆惠屯濟爾哈朗副將軍富德攻葉爾羌攻伊西洱庫爾淖爾海祿皆在軍中賜花翎並號噶卜什海巴圖魯又以邊功擢二等侍衛溫福討金川海祿將四百人攻斑爛山及斯當安攻日耳東瑪美美諸寨及固卜濟山梁又克路頂宗喀木色爾諸寨破明郭宗潘內碉卡自前鋒參領攝陝西固原鎮總兵溫福師敗績海祿自美諾退巴胡拉定西將軍阿桂論劾當奪職命寬之師自資理南山入得阿喀木雅山上碉一至路頂宗山陡峻夜半潛入賊壘殲賊三十餘墜崖死者相

枕籍遂拔路頂宗卽督兵進攻明郭宗克之直抵美諾賊驚潰獲大礮十餘米糧百餘石擄固原鎮總兵從阿桂自薩爾赤鄂羅山攻克登古碯卡復自喇穆喇穆迤西進得石卡一攻得斯東寨色湖普喇穆穆山梁屯日則了口要路又攻該布達什諾木城連克碯寨攻遜克爾宗賊出伏兵擊之潰旋借副都統富興進至沙爾達朗克大碯五並克伊格爾瑪迪等碯卡再進借副都統烏什哈達奪羅卜克鄂博溝內碯寨攻克格魯克古山梁再進攻康薩爾督兵驅濠入賊窺再進攻克勒吉爾博山梁乘勝沿河擊賊大破之師攻木思工噶克了口海祿以兵應殲賊甚衆攻克邁過爾山梁復借烏什哈達攻了口左木城石碯拔之又自舍圖枉卡分攻巴占攀藤扶石自山腰斜上遂奪據昆色爾進攻章噶大碯克之並奪木城一借襄陽鎮總兵官達色攻黃草坪占其地移直隸天津鎮總兵旋率土兵奪兜窩碯卡復奪取莎羅奔甲爾瓦沃雜爾所居之拉布咱占又借副都統書麟等攻則朗噶克焚噶爾噶木勒烏果木得克姑烏諸賊寨金川平圖形紫光關賜騎都尉世職擢雲南提督四十六年入覲至湖南

聞薩拉爾回蘇四十三叛請從軍賊佔華林山海祿從海蘭察攻之多所斬獲旋進至華林寺燬賊巢燬焉授烏魯木齊都統海祿刻覈吏事在邊禁古城迤北湖圖斯金廠重定新疆屯田徵租功過視舊例爲苛追論文武吏士剝下營私狀領隊大臣圖思義提督彭廷棟以下皆坐譴又請裁汰經費視內地編保甲臺灣民坐械鬥戍邊入烏魯木齊鐵廠輸作予巴里坤諸地戍兵爲奴皆議行復疏請自哈密至精河設臺車三百五十烏魯木齊設臺車一百五十定值視雇商車減三之二烏什辦事大臣紳克托塔爾巴哈台辦事大臣惠齡陝甘總督福康安皆言車值過薄福康安並力陳設臺車不若雇商車便上爲罷海祿議造臺車糜帑令責償伊犁將軍伊勒圖又疏請罷海祿所議屯田徵租功過及戍邊入鐵廠例左授伊犁額魯特領隊大臣五十二年勅將軍奎林毀佛像辱職官折罪人手足擲水中得遣戍罪人賊又於哈薩克以羊易布私其美金上奪奎林職令海祿並詣京師命諸皇子軍機大臣會刑部廷鞠奎林承毀佛像殺罪人餘事皆無據上命並奪海祿職在上虞備用處拜唐阿上效力行

走尋授藍翎侍衛累遷至福建陸路提督卒

成德鈕祜祿氏滿洲正紅旗人初入健銳營充前鋒從征準噶爾葉爾羌俱有功征緬甸從將軍明瑞自錫箔進兵攻賊舊小蒲坡中槍傷戰猛拜天生橋猛城諸地從副將軍阿里衮攻頓拐燬其寨從經略大學士傅恒渡曼鳩江自猛拱猛養進兵敗賊於新街定邊右副將軍溫福征小金川成德從攻斯當安裏創力戰進攻巴朗拉再進克資哩古布濟八角寨諸地復被創自空卡昔嶺進兵屢捷累遷四川川北鎮總兵木果木大營陷溫福死之成德時將別軍駐美諾亦陷於賊命奪官仍留任將軍阿桂令自南山攻取阿喀木雅會領隊大臣額森特總兵海祿三道並進擊東溝賊碉殲賊甚衆路頂宗明郭宗諸營卡皆下復美諾賜黑狐冠小金川平復官師自谷噶入大金川抵羅博瓦山成德偕總兵特成額等分兵綴賊復會克色溯普山奪堅碉數十進攻喇穆喇穆東面山碉賊分兩路襲師後擊敗之偕散秩大臣普爾普等奪石碉四又偕總兵官達色攻克該布達什諾木城會內大臣海蘭察進圍逸克爾宗賜號賽尙阿巴

圖魯進攻甲爾納寨圍急賊潛以皮船渡成德擊破之賊據赤布寨其北爲得思古寨循溝下有噶朗噶爾噶諸寺碉寨繁密師循溝進破最東水碉成德乘勝奪大碉五木城二直抵瀕河噶爾丹寺賊奔潰師克舍圖枉卡成德潛師至日則了口與遊擊普吉保上下合擊破石碉八木城四遂克邁克爾宗賊退勒烏圍復進會師破之進克甘都瓦爾黃草坪等處遂克噶拉依金川平圖形紫光閣列前五十功臣署四川提督三暗巴番渠安錯煽亂督兵捕治命眞除五十三年廓爾喀侵後藏命成德爲參贊大臣督兵借總督鄂輝駐藏大臣侍郎巴忠會剿巴忠授意噶布倫丹津旺珠爾與廓爾喀議歲費還侵地成德爭不獲卽以此議入奏師還授成都將軍後藏不如約斬歲費不與廓爾喀復來犯巴忠自經死上命鄂輝成德督兵定藏自贖復以滯滯失機奪將軍予副都統銜以領隊大臣屬將軍福康安調遣攻拉木與穆克登阿夜督兵進成德攻寨西北穆克登阿出西南擲火彈殺賊破寨盡殲守寨賊無一得脫者福康安自濟甯進兵令成德等分道進屯德親鼎山克敵卡自俄瑪措山進迭克果

果薩喇嘛寺乘夜取札木鐵索橋又自江各波邁山梁趨隴岡與彥吉保會逐賊至利底與福康安師會所向克捷廓爾喀乞降師還命成德以副都統銜充駐藏幫辦大臣圖形紫光閣前十五功臣以成德爲殿尋命署杭州將軍仁宗卽位移署荊州將軍教匪起成德偕總督惠齡攻賊宜都灌灣腦山擒賊首張正謨尋以縱賊竄逸奪勇號四年致仕卒以曾孫女配宣宗爲孝全皇后追封三等承恩公諡威恪子穆克登布自有傳

馬彪甘肅西甯人以行伍從軍累遷至四川川北鎮總兵高壽縣丞邱天寵私伐巴彥濟魯薩林木貝勒羅卜藏達爾札訴於上詞連彪奪職尋賜遊擊銜駐雅爾復起除雲南昭通鎮總兵乾隆三十六年師征金川將軍溫福以彪屢出師勇往令將貴州兵三千以從克巴朗拉碉卡賜花翎師自達木巴宗分三道趨資理彪偕侍衛額森特等自北山進奪賊碉卡斬敵百餘與師會彪以貴州兵二千駐資理北山梁東西距三十餘里賊夜犯都司黃壯略守備王廷玉營彪與侍衛巴三泰馳援敗賊失礮三上以彪戰甚力不之罪嗣都司徐大勇等

守色布巴爾賊屯十里外高峰參贊五岱檄彪赴援未至副將色倫泰戰沒五岱劾彪逗遛當奪職上命留任尋自顧藏噶爾進駐色布色爾阿桂軍次喇卜楚克山麓偪木蘭壩令彪伏兵東崖下克其水壩進攻色爾渠彪從參贊豐昇額等擊東瑪砮克之乘勝攻哲木克郭羅郭羅美羅喇嘛寺諸寨皆下奪壩五俘馘數十攻美美卡彪率二百人自山梁小徑入賊來援力戰破之美美卡至日喀爾橋有小徑曰兜烏賊毀橋築卡以拒彪伐木爲橋濟兵賊棄卡走又與提督哈國興合克喀木色爾穆拉斯郭寨遂據兜烏尋自達克蘇山後攻明郭宗彪將千人自格實迪下攻賊棄壩竄授西安提督復偕侍衛烏爾圖納遜攻達爾圖大壩斃竄賊甚多遂偕領隊大臣華善等以六千人駐宜喜賊來犯擊之斬賊三十餘人以三千五百人攻達爾圖壩未下賊自沙壩三道襲宜喜軍又別遣賊夜撲達爾圖軍擊走之師克乃當至獨松彪與賊戰中巴布里下巴布里及瑪雅岡角木賊皆棄寨遁旋與副將欽保克爾瑪及扎烏古山梁與總兵敖成克甲索金川平赴西安任圖形紫光閣列前五十功臣移湖廣提督卒

贈太子太保益勤襄子雲騎尉世職

常青蘇木克氏滿洲鑲白旗人自前鋒累遷護軍參領外擢雲南曲尋鎮總兵從將軍明瑞討緬甸戰於蠻結明瑞將中軍常青與領隊大臣觀音保踞西山梁賊突至常青等奮擊賊二百餘賊敗竄又滅二千餘俘三十四再戰天生橋宋寨黃土岡諸地屢敗賊明瑞軍敗績上召常青入對命仍還雲南從副將軍阿里衮出萬仞關經略大學士傅恒令詣野牛壩督造戰船率兵赴新街殺賊奪寨獲敵舟及糧械旋自新街進攻老官屯克毛西寨師還授雲南提督乾隆三十八年師征金川令率雲南兵二千赴打箭爐佐將軍阿桂出西路借都統海蘭察攻斯達克拉阿噶爾布里碩藏噶爾諸山梁克之留屯美諾師攻布朗郭宗阿桂奏請常青策應常青遣遊擊福敏泰駐木波遊擊保甯駐噶魯什呢守備張啓貴駐美臥溝而與副都統富興率兵爲布朗郭宗聲援西藏語謂爲盜曰放夾壩常青與富興督綠營兵捕盜焚其林阿桂師進攻勒烏圍常青與富勒渾護餉道自明郭宗至大板昭兵卒巡視分守小沙壩沙壩三松坪諸地

自問道出功噶爾拉擊賊上嘉之諭以此路官軍久未進攻今自問道出奇足以縶賊惟地勢險峻仍戒其輕舉金川平圖形紫光閣列後五十功臣移古北口提督而以海祿代之疏言緬甸方議撫請暫留張鳳街與海祿相機籌辦上以夷性多疑文檄仍用常青舊銜俟事定赴新任歷浙江江南直隸福建陸路提督又繼海祿爲烏魯木齊都統移西安將軍卒諡莊毅

官達色瓜爾佳氏滿洲正黃旗人以前鋒從征準噶爾將軍兆惠自鄂壘扎拉圖轉戰至特納格爾上方南巡遣官達色及副護軍校兆坦齋疏詣行在召對授藍翎侍衛準噶爾平子雲騎尉世職迭遷副參領外擢雲南順雲營參將自陳不通漢文乞還京師經略大學士傅恒討緬甸以官達色監鎔礮令從軍旋授健銳營前鋒參領乾隆三十六年將軍溫福征金川令將成都駐防兵四百人從攻巴朗拉山梁與烏什哈達督兵自山右登奪卡六再戰官達色發礮毀賊礮戰三晝夜克之賜號巴爾丹巴圖魯昇白金百師逾達木巴宗至斯底葉安賊力拒官達色發礮墮其礮樓命署四川松潘鎮總兵師乘雪擊賊賊引退

官達色逐賊賊亂流渡竄阿哈木雅移軍逼賊寨官達色發礮擊之寨垂破賊夜遁溫福督師攻南山官達色與總兵牛天昇合軍天昇取第二碉官達色取第三碉復命興湖北襄陽鎮總兵師攻達爾圖賊蔽碉爲固官達色發礮擊之日斃賊數十師進破碉二拔柵殲賊甚衆副將軍豐昇額攻谷訥官達色與侍衛普濟保等以四千人往會旋以將軍阿桂檄從參贊海蘭察攻喇穆喇穆奪卡三逼碉下擲火彈以雨不然暫引退復以六百人直陟高峰峰有大碉二夜半援石壁蟻附登伏碉旁黎明突起遂破二碉進攻該布達什諾賊爲大碉倚濠輔以木城官達色督兵冒槍石躍濠以度剗碉址成遂援以上賊退保木城阿桂令海蘭察山城後官達色當其前力戰克之再進攻默格爾山聚官達色與額森特等合軍取碉三旋與海蘭察額森特分道裹糧深入攻格魯克了口克當噶海寨及陡烏當噶大碉焚沙木拉渠寨循格魯格克古山梁以下賊傍籌置卡督兵攻之下真除襄陽鎮總兵再進攻勒吉爾博戰於山麓破賊碉再進攻榮克爾博克其麓木城督兵陟山巔與普爾普踰溝拔木柵二十六自舍

圖拉卡循混色爾山梁攻據雅木則碉取果克山諸碉寨圖拉枯喇嘛寺盡燬之再進與海蘭察等同攻章噶賊緣碉鑿深溝設柵其上官達色督兵拔柵以覆溝援附至碉巔下攻賊驚竄遂克之與海蘭察合軍向勒烏圍分攻隆斯得其地有三寨克其二遂潛破後寨寨內蓄鉛子積地二尺許火藥百餘簍悉收以佐軍設礮臺偏轉經樓與保甯彰麟合軍克之勒烏圍亦下與海蘭察等攻達烏連破諸碉寨進攻西里賊四出力禦官達色諭溝與戰賊穿林逃攻黃草坪海蘭察當其前官達色與海祿拔溝北柵爲應攻奔布魯木峯木城亦與海蘭察偕攻瓦喇占發礮破其碉循瓦喇占而下曰薛爾歪有寨三海蘭察當其前官達色與烏什哈達左右合擊賊棄寨走邀殪之攻科布曲木城又與海蘭察偕官達色冒槍石先登攻朗阿古海蘭察自山腰險徑度兵官達色與烏什哈達出其左攻雍中喇嘛寺官達色與普爾普等自右入皆力戰殺賊遂破噶拉依金川平圍形紫光閣列前五十功臣予一等輕車都尉世職移山西大同鎮總兵再移直隸宣化總鎮兵卒烏什哈達吉林滿洲正黃旗人師征緬甸以

前鋒校從有功賜號法福哩巴圖魯師征金川以三等待衛從其與官達色同克巴朗拉也賊攻據所駐山復力戰破賊奪其山還事聞上以功過足相當宥之戰屢有功累擢正藍旗蒙古副都統師還圖形紫光閣列前五十功臣予騎都尉兼雲騎尉世職外授和闐領隊大臣許辦事大臣德風受賂按治不盡實奪職師征臺灣以頭等待衛從與普爾普自茅港轉戰通嘉義道尋將水師至瑯嶼獲莊大田還前所賜勇號再圖形紫光閣列後三十功臣師征廓爾喀以鑲紅旗蒙古副都統從先行治道蹟而傷師還賞不及入見以爲言上責其巧佞奪職戍伊犁嘉慶初赦還師征川楚教匪以頭等待衛從賊渠王三槐擁衆渡江烏什哈達與戰死之子輕車都尉世職瑚尼勒圖鄂訥氏黑龍江人以護軍入滿洲鑲黃旗累遷護軍參領從征金川亦與巴朗拉之役賜號多卜丹巴圖魯攻資理南山戰自喇卜楚克山梁繞登高峯奪賊卡二遂陟其巔又奪賊卡二復從海蘭察等攻羅博瓦前山賊二百餘自其右緣山梁斜上瑚尼勒圖擊殺十餘人賊遁走進攻布達什諾克之加副都統銜復進攻邁克爾宗焚賊

寨十餘賊來援却之師攻勒烏圍遣瑚尼勒圖奪據默格爾山進占日爾巴當
噶爾之西危峯突起海蘭察等更出其西自密拉噶拉木山顛下擊遂克凱立
葉諭嘉獎非勝攻克日爾巴當噶爾山陽左右五碉又從海蘭察等攻取桑噶斯
瑪特山寨與福康安督兵將出箚見賊碉二奮勇躍入殺賊賊潰擄鑲藍旗蒙
古副都統師攻達佳布安吉諸碉督兵自山腰賊碉間攀越而過先入碉皆克
之進攻木思工噶克令瑚尼勒圖攻了口潛師而入遊擊梁朝桂等爲繼了口
辟左右碉十有四同時皆破師次榮噶爾博有山梁曰巴占爲勒烏圍門戶賊
守禦甚力諸將議自舍圍枉卡間道入而使瑚尼勒圖屯巴占分賊勢師克章
噶瑚尼勒圖亦取巴占分攻隆斯得寨以斧破寨門獲所儲餉藥遂攻下勒烏
圍復攻西里山梁瑚尼勒圖與烏什哈達督兵徑陟克大碉三木城四師攻西
里正寨與福康安以火攻破寨又與海蘭察取朗阿古攻克得拉古碉卡復自
巴薩沙進取奇什磯官寨與福康安等克雍中喇嘛寺金川平圖形紫光閣列
前五十功臣轉鑲紅旗蒙古副都統尋授散秩大臣管理健銳營卒

敖成字丹九陝西長安人入伍從征際對金川庫車戰喀喇烏蘇河攻葉爾羌俱有功乾隆三十八年師再征金川成以廣西右江鎮總兵入覲上詢知成營出師際對金川賜花翎並畀白金百給驛詣軍前旋移甘肅軍夏鎮以將軍阿桂請復移貴州鎮遠鎮師三道進副將軍明亮出南路請以成駐價格宗防後路上慮成未足當一面命從明亮軍進討桂林疏言南路當自塔克撤至宜喜諸地設防成自薩穆果穆渡河經美諾至塔克撤駐軍明亮移軍宜喜攻達爾圖山梁使成偕副都統舒景安率師攻日旁奪賊卡二破碉寨四百餘殲賊甚衆諸軍攻宜喜圍合調甲索守賊皆老弱當攻其瑕成偕副將常泰等率土漢兵二千五百分三道進破其要隘先後奪碉十一上嘉其勇勦號價格巴圖魯復自達爾圖山梁進攻噶爾丹直薄巴布里山脊值夜大雪潛師出碉後奮擊連克防禦賊卡四守碉賊驚潰追斬無算復偕常泰攻克碾占偕提督馬彪率師至甲雜官砦賊棄寨潰竄師三路畢會遂克噶喇依金川平圖形繫平閣列前五十功臣御製贊以乘雪取巴布里比諸李愬之入蔡州擢貴州提督入覲

賜黃馬褂卒贈太子太保諡勇愨子雲騎尉世職

圖欽保瓜勒佳氏滿洲鑲黃旗人以前鋒校從將軍明瑞征緬甸有功授三等侍衛賜號法福禮巴圖魯遷健銳營副前鋒參領乾隆三十七年從將軍阿桂征金川以皮船濟師襲烏達西山碉卡圖欽保與總兵王萬邦自其左進攻其碉復與侍衛三寶等合兵至邦中山梁緣溝以登盡取諸碉卡自山下夾攻賊潰師至納圖納札木副將軍明亮等分兵三道並進圖欽保與游擊谷生炎攻山坡碉卡賊力拒復與侍衛德赫布三面合圍壘石卡逼賊棄碉夜遁師進至僧格宗圖欽保自河西科多渡橋攻河東至喀咱木籠山梁抵奎壘賊奔美諾復與參領拉布棟阿以五百人取馬奈擢湖南長沙協副將師復進至薩克薩谷其北曰茹寨麥方熟賊設碉以衛圖欽保力攻克之焚沿河各寨賊竄出中矢被鎗及墜河死者無算麥田十餘里皆爲我兵所據事聞上手詔獎勵復攻石頂噶山下木城燬賊寨再進攻扎烏古山梁功最擢陝西固原鎮總兵事定圖形紫光閣與德赫布並列前五十功臣四十六年撤拉爾回叛圖欽保

將五百人助戰賊退踞八蜡廟水磨溝諸地圖欽保從都統海蘭察率兵越水磨溝自山梁進逼賊巢賊自山坡逆上圖欽保持刀奮戰馬蹶墜山下被創卒賜白金七百

木塔爾小金川人乾隆三十七年小金川頭人僧格桑爲亂拒我師木塔爾率親屬及所部降將軍溫福令從軍即率土兵奪八角碉降千餘人復官奏攻木果木面中石傷克達馨谷山梁槍傷額累擢三等侍衛賜孔雀翎僧格桑寬大金川大金川頭人索諾木匿之與同亂將軍阿桂令木塔爾偵路約內應遂克阿不里招其叔朗納降金川山徑歧互阿桂令木塔爾指畫繪圖呈覽又以功噶爾拉賊守堅諸木塔爾言谷噶山路崎嶇樹木深密若密遣精兵晝伏夜行出賊不意亦一策也從之戰有功官兵護台站遇賊稍卻阿桂令木塔爾偕降人度噶率土兵截擊禽頭人木穆工阿攻庫魯什尼後山及登春諸地禽頭人拉爾甲創僧格爾爾結以功賜緞賊遣別斯滿尼僧布薩僞降私詢木塔爾軍事木塔爾密以聞上嘉其誠累擢頭等侍衛師攻噶拉衣索諾木等出

降賜號贊巴巴圖魯圖形紫光閣列後五十功臣授八角喇屯守備督帛噶爾
角克乃薩納木雅諸地降人屯田四十六年甘肅撤拉爾回蘇四十三攻陷蘭
州上命從領侍衛內大臣海蘭察軍討之木塔爾從中槍傷賜銀緞復攻華林
寺再受傷賜二品銜以四川管理降番副將題補四十九年甘肅固原回田五
等餘黨踞石峯堡上命成都將軍保甯討之木塔爾從力疾赴調賜散秩大臣
銜至石峰堡屢有斬獲被石傷五十三年從征臺灣借侍衛博斌等生擒首逆
莊大田於椰嶼臺灣平復圖形紫光閣列前二十功臣五十六年廓爾喀爲亂
攻陷聶拉木木塔爾從成德守木薩橋獲頭人格喇達喀噉哈等加副都統銜
師攻濟噶木塔爾借侍衛哲森保先攻克東南山梁移兵逐賊復濟噶噉賊數
百殲賊目七師攻雅爾賽拉博爾東拉木塔爾率兵自噶多普紆道渡河奪石
卡木城廓爾喀平再圖形紫光閣列後十五功臣上特召慰勞賜酒資銀緞六
十年從征苗匪賊居下石花土空等處循沿河山坡築城卡阻我師總督福康
安遣木塔爾於下游河岸設伏賊出卡搶掠突出擊之奪其渡船師進迫之賊

不能禦連克城卡進攻土空借總兵花連布等連戰三晝夜破之賜荷包以病
還師至資陽道卒賜白金百

岱森保庫雅拉闊綽里氏滿洲正紅旗人以黏罕處拜唐阿從征緬甸移師征
金川與攻路頂宗喀木色爾授藍翎侍衛戰於昔嶺賊乘高而下以火器奮擊
賊潰授三等侍衛戰於博羅瓦嶺賊數十復奪取喀木喇瑪山碉壘二等侍衛
賜號布隆巴圖魯攻勒吉爾博山梁拔鹿角躡濠以火彈擲岫巔破之從將軍
阿桂攻勒烏圍發礮斷其橋隧以入柵克木城與諸軍合攻勒烏圍遂下授頭
等侍衛師還圖形紫光閣列後五十功臣四十四年以護軍參領從征臺灣與
侍衛烏什哈達等擊賊沙崱進至鷲松殲賊二百餘擊賊中州發巨礮殺賊進
擊賊南潭賊潰焚賊寮數百再進擊賊三坎店奪賊中礮械尋從閩浙總督常
青等援諸羅出鹽水港戰賊屢勝賜副都統銜福康安視師岱森保攻賊牛莊
賊阻溪爲固督兵踰溪擊之俘斬甚衆乘銳抵南潭遂俘莊大田等師旋再圍
形紫光閣列後三十功臣擢正黃旗蒙古副都統出爲伊犁領隊大臣廓爾喀

爲亂上命岱森保將索倫達呼爾兵千人偕參贊大臣海蘭察自京師道青海入西藏佐福康安等討之既至福康安令偕成都將軍成德將三千人向斯拉木緞賊分兵自措克沙木間道入自率兵趨親鼎山破賊卡賊敗竄旋偕侍衛永德道哈那滾木山克扎木復偕成德敗賊多洛卡追蹙至俄賴巴分兵兩路深入廓爾喀會降復圖形紫光閣列後十五功臣嘉慶初教匪起命岱森保討賊陝甘張漢潮侵五郎自盪屋出大建溝擾洵陽偕總兵長春副都統綸布春隨所在禦之上責肅清甘肅境與西安巡撫台布選能戰兵四千有奇逐賊轉戰屢有克捷五年秋擊賊沔縣以兵寡未獲窮追還軍駐長寨疾作行至漢中卒

翁果爾海喇巴喀氏滿洲鑲黃旗人初充親軍遷藍翎侍衛乾隆五十二年從福康安征臺灣擊賊八卦山斬敵無算賜號額騰額巴圖魯累遷二等侍衛林爽文遁老衢崎義民高振以告翁果爾海與追擊獲之臺灣平予騎都尉世職五十六年廓爾喀侵後藏從將軍福康安參贊海蘭察往討之賊據擦木其地

兩山夾峙惟一徑可通夜雨翁果爾海分兵潛進越山直上山梁與師會薄賊寨踰牆入殲賊數百克其碉賊奪據濟隴官寨師圍之翁果爾海直攻東南山梁賊恃碉拒師督兵緣碉上殲賊六百餘擢頭等侍衛賊據熱索橋師自擺馬奈撤入與夾河相持翁果爾海自岷綠山紆道出上游斫木編筏潛濟自間道疾馳攻賊寨師悉渡賜副都統銜賊竄協布魯負水築卡爲守師不得卽渡暮兩伏兵林中夜將半援木涉水進擊師繞出對山併力下攻賊潰走追斬三百餘焚寨五遂進攻東覺道噶多翁果爾海從海蘭察爲前鋒紆道出雅爾賽拉博爾東拉穿林越箐潛師步行賊爲木城三石卡七守甚堅翁果爾海督兵踰險攻之右臂創甚劇援兵至奮勇轉戰殲頭人二餘賊二百有奇賊乃遁悉墮其城卡賜白金五十廓爾喀平圖形紫光閣列後十五功臣授鑲黃旗蒙古副都統嘉慶初卒

珠爾杭阿顏拉扎氏滿洲正黃旗人自前鋒累擢二等侍衛從征甘肅石峰堡亂回賜號錫利巴圖魯五十六年廓爾喀侵後藏上命鄂輝成德討之命珠爾

杭阿佐軍鄂輝以第理浪窩浪卡兩地當衝要令珠爾杭阿察形勢督兵屯守
尋借侍衛永德攻克站木哲木寨賜大緞復借將軍福康安自宗喀攻擦木與
參贊大臣海蘭察合軍自正路攻賊寨克之賜大小荷包復同頭等侍衛阿滿
秦等克濟囉遷頭等侍衛復從海蘭察攻雅爾寨拉博爾東拉毀木城石卡殲
賊甚衆又破賊於瑪木拉加副都統銜進攻噶勒拉推補木大山分兵三路珠
爾杭阿借三等侍衛阿哈保等自右路夾擊焚賊卡復自橫河上游修橋渡攻
集木集克之尋命爲領隊廓爾喀頭人拉特納巴都爾降福康安令珠爾杭阿
護貢使詣京師圖形紫光閣列後十五功臣累遷御前侍衛正白旗護軍統領
神武門獲爲逆者陳德賜騎都尉世職授鑲藍旗滿洲副都統卒

哲森保薩克達氏滿洲鑲藍旗人初充吉林烏拉馬甲征緬甸借侍衛阿爾蘇
拉擊賊新街從副都統明亮擊賊老官屯從討王倫侍衛晉濟圖擒賊將就縛
突有賊持械出拒哲森保射殺之從討蘇四十三攻華林山鎗殲賊渠哲森保
亦被創賜號法福里巴圖魯累擢二等侍衛乾清門行走再出討石峯堡亂回

中石傷擢頭等待衛授公中佐領從征廓爾喀攻撥木哲森保與翁果爾海各將一隊自東西兩山分進克之攻濟隴首奪東南山梁師繼進遂克濟隴官寨賊斷熱索橋哲森保與阿滿泰山間道越岷緣山自上游砍樹結筏潛渡驟攻賊卡賊駭愕奔竄師得濟賜副都統銜至博爾東拉與賊力戰左膝中槍賜白金百令還濟隴休養至協布魯創發卒廓爾喀平圖形紫光閣列後十五功臣祀昭忠祠賜騎都尉世職子富永亦在軍以戰功累擢三等侍衛襲職官至鎮黃旗蒙古副都統卒

論曰金川地小而險懸崖絕壁壘石爲碉師至不能下高宗讀太宗實錄知其時攻城用雲梯命戮其制督八旗子弟習焉師再出攻碉賴是以濟諸將有勞者五福將四川兵彪將貴州兵常青將雲南兵成將綠營木塔爾將土兵餘皆率禁旅而官達色督礮兵圖欽保佐健銳營尤專主攻碉摧堅決險非豫不爲功成德俗森保及木塔爾復從征廓爾喀有功翁果爾海等未與金川之役而屢從征伐轉戰立勳名亦裨佐之良也

清史稿

列傳一百二十一

馬全

漢州人 乾隆初 授 阿爾泰 副都統

曹順

湖南人 乾隆初 授 廣西 副都統

科瑪

滿洲人 乾隆初 授 內務府 筆帖式

常祿保

蒙古人 乾隆初 授 廣西 副都統

扎拉豐阿

蒙古人 乾隆初 授 內務府 筆帖式

許世亨

字文說 河南人 乾隆初 授 內務府 筆帖式

台斐英阿

阿爾泰人

花連布

湖南人

馬全字具堂山西陽曲人初名琮乾隆十七年一甲三名進士自二等侍衛出
 爲福建撫標右營遊擊與同官爭言奪職更名寄籍大興二十五年會試再中
 式上御紫光閣校閱見全識之問曰爾馬琮耶全叩頭謝罪遂成一甲一名進
 士授頭等侍衛二十七年扈上南巡命署江西南昌鎮總兵賜孔雀翎疏陳校
 閱各營操練赴禁山隘口巡查防奸民闖入上褒其奮勉授江蘇蘇松鎮總兵
 擢江南提督請改歸原籍調甘肅提督陞見賜黑狐褂三十八年命從征金川
 爲領隊大臣將軍溫福駐軍木果木全偕都統海蘭察分攻昔嶺奪碉二賊大
 至鏖戰冰雪中一晝夜卒敗賊會日暮撤兵賊後尾追爲伏擊敗之搜山麓逸

賊建柵數十爲聲援木果木大營潰全殿後戰竟夜死之事聞上曰提督馬全乃國家出力有用之人今力戰死事實堪軫惜諡壯節子騎都尉兼雲騎尉世職同時死事諸將有戰績者牛天昇阿爾素納張大經天昇山西太谷人以武進士授藍翎侍衛累遷四川北鎮總兵征金川天昇率兵赴木坪佐提督董天弼進勦師自達木巴宗分三道趨資理天昇偕侍衛阿爾素納擊賊于瑪爾瓦爾濟山巔戰三晝夜克卡十與大軍會賜孔雀翎師圍資理天昇攻南山參贊五岱攻北山未下上以阿喀木雅地富孔道得此可破資理手敕諭諸將天昇偕侍衛烏什哈達將四百人覓路伏箬中誘阿喀木雅守賊出寨擊之賊敗匿天昇列兵山麓截賊援賊四百餘突出寨援賊二百自得爾蘇山至天昇擊之斬五十餘級參贊大臣阿桂代五岱攻北山賊不支天昇自南山夾擊遂克資理阿喀木雅得爾蘇賊皆潰天昇捕治餘賊巖洞箬林搜戮殆盡自得爾蘇山巔下至河岸訖北山麓皆屬我師攻喇卜楚克山巔賊守甚密副都統富勒渾出山後奪卡四天昇自前登奪卡一賊自林中出天昇督兵冒槍石縱火焚

賊卡又借章京德保等進攻布郎郭宗取德木達碉寨三石卡七與大軍會遂克之進取底木達俘澤旺三十八年師攻功噶爾拉天畀與副都統烏什哈達總兵張大經冒雪陟山前二峰奪其碉賊自山後至擊之走定邊將軍溫福疏陳天畀戰功請署貴州提督木果木大營潰天畀力戰死之諡毅節子騎都尉兼雲騎尉世職子敬一自陳文生不習弓馬賜舉人阿爾素納祿葉勒氏吉林滿洲鑲黃旗人乾隆時以前鋒隨征西域緬甸累遷二等侍衛賜號額騰伊巴圖魯金川叛從征攻巴朗拉與侍衛額森特先登攻資理阿喀木雅美美卡兜烏諸地均有功擢一等侍衛加副都統銜授領隊大臣隨大軍移營木果木履克竭卡授鑲白旗蒙古副都統大營陷率滿洲兵退行至大壩溝遇賊力戰死贈都統銜子騎都尉兼雲騎尉世職大經山西鳳台人乾隆時由武進士歷官陝西興漢鎮總兵三十六年率西甯陝西兵各千人從征金川師圍資理大經出中路進攻兜烏大經以兵千駐阿喀木雅旋移駐木蘭壩鄂克什舊寨從攻明郭宗克之復從攻底木達俘澤旺三十八年溫福進駐木果木大經將五百

人分駐簇拉角克上以其地在功噶爾拉了口之北形勢險要諭增兵協防四月借烏什哈達等攻達扎克角山擊敗伏籌賊沿山下攻得斯東塞賊棄寨遁木果木大營潰參贊大臣海蘭察檄大經撤兵出遇賊於乾海子路險不能騎徒步力戰死子騎都尉世職諸將死事皆祀昭忠祠全天昇阿爾素納並圖形紫光閣全列前五十功臣天昇阿爾素納皆列後五十功臣

曹順四川閬中人入伍從將軍溫福征金川師攻固卜濟山梁賊爲柵阻木蘭壩路柵內發槍石其渠啓柵門出順斬之奪門入焚柵殲柵內賊賜孔雀翎從攻明郭宗自木雅山至木爾古魯山麓奪賊寨卡進克嘉巴賜號扎親巴圖魯順與頭等侍衛烏什哈達督兵至功噶爾拉攻昔嶺又與司轡托爾托保率瓦寺鄂克什土兵先過卡殺賊數十賜緞二匹攻昔嶺第五碉與副都統巴朗普爾普等分兵攀登溝內伏賊起迎擊斬其渠順面中石傷先後叙功遷湖南衡州協副將阿桂策督諸軍攻宜喜先攻木思工噶克及得式梯緘賊使不相應令書麟等攻了口碉卡賊赴援順功峰右碉克之師自康薩爾進據了口山

峰悉力拒退復進者七順與侍衛穆哈納等迎擊羣賊悉殲遂克撥庸寨師分道斷賊後路順督土兵縱火與參贊大臣豐昇額爲犄角並進賊不能支穴寨後竄順奮擊迫賊墜箐死取石碣十二遂克邁克爾宗撥甘肅肅州鎮總兵四十年閏十月攻西里山麓黃草坪順跨木欄指麾賊於暗中發槍被創沒於陳金川平與福建甯鎮總兵敦住陝西延綏鎮總兵烏爾納並祀昭忠祠同形紫光閣同列前五十功臣敦住瓜爾佳氏滿洲正黃旗人昭勳公圖賴四世孫圖賴曾孫馬爾薩事聖祖自佐領擢至本旗都統雍正初授內大臣佐靖邊大將軍傅爾丹駐和通呼爾哈諾爾賊來克馬爾薩力戰殺千餘人大風雨渡哈爾噶河戰沒子騎都尉兼雲騎尉世職敦住其從子也乾隆初襲職累邊頭等侍衛從征金川三十九年令署總兵攻宜喜冒雨克達爾圖俄城詔調十一月攻日旁自木克什進短兵搏戰沒於陳烏爾納喇氏滿洲鑲藍旗人自護軍累遷至甘肅蘭州城守營參將從征金川克沙壩山賜孔雀翎攻邁克爾宗攻甲爾納皆力戰中槍攻榮噶爾敗援賊再遷總兵復克邁過圖進屯凱立葉

從攻木思工噶克勒吉爾博得式梯諸地累有功師攻勒烏圖烏爾納從攻轉
經樓盡下諸城寨師征大金川攻西里烏爾納督兵造甲爾日磧浮橋賊至擊
敗之力戰至科布曲率前隊渡河克其第四碉四十一年從攻噶喇依二月噶
喇依既克喇嘛寺火起延及火藥房烏爾納往救藥礮石躍中傷死上以烏爾
納轉戰甚力功成身殞深嗟惜焉議卹順予世職騎都尉兼雲騎尉數住進世
職三等輕車都尉烏爾納官其子都司

科瑪敖拉氏滿洲正黃旗人以三等侍衛從征金川師攻克邦甲山梁科瑪自
翁克爾暨力戰至美諾奪碉寨賜號納親巴圖魯攻當噶爾拉山梁科瑪督兵
斧斫柵逼碉毀其垣以入殺賊從克美諾拉約將六百人取卡卡角繞山山後
仰攻殲守賊副將軍明亮攻斯第科瑪將三百人陟西岡又克達爾圖第六碉
累擢頭等侍衛授領隊大臣將六百人攻谷爾提獲頭人索爾甲木達爾甲等
督兵攻沙壩擲火彈蕪賊寨二百餘加副都統銜四十年四月自得楞力戰至
基木斯丹營噶深入賊陳中槍死佛倫泰庫雅拉氏滿洲正白旗人亦以三等

侍衛從師克巴朗拉賜號扎勒丹巴圖魯攻資理衝入石卡殺賊四十餘俘十
二遂克之將五百人取咱贊及溝東諸寨攻美美卡佛倫泰自西山下多祈獲
從攻路頂宗底木達達爾剛日旁凱立葉皆有功攻遜克爾宗兩日受石傷攻
康薩爾克其碼加副都統銜標領隊大臣四十年四月師攻基木斯丹富噶科
瑪戰死佛倫泰自薩克薩谷進至榮噶爾力戰亦沒於陳遠爾泰薩克達氏滿
洲鑲藍旗人以護軍從征緬甸戰新街老官屯有勞征金川命選年壯得力將
士達爾泰與焉攻明郭宗昔嶺奪據達扎克角泉水師攻羅博瓦山賊來援達
爾泰迎擊賊潰督兵殺賊上駐軍山畔賜號額依巴爾巴圖魯累擢二等侍衛
攻甲爾納來珠寨賊出我軍後自山梁下達爾泰設伏射賊賊負創遁四十年
五月擊賊達撒谷被數創卒薩爾吉岱博和爾氏齊齊哈爾鑲紅旗人以藍翎
侍衛從克馬奈日旁再進攻該布達什諾色湖普薩爾吉岱衝入賊陳力戰盡
克其壘卡賜號善巴巴圖魯從克默格爾凱立葉授三等侍衛攻格魯克古了
口賊負險據寨槍石並發薩爾吉岱奮登了口射賊破賊引退我師從之越山

滿五奪碉五十寨卡三百餘攻達瑪噶喇山梁克其碉師臨勒烏圍分道攻轉經樓賊來援薩爾吉岱伏兵橫擊賊潰師自達烏達圍向富噶克底薩爾吉岱爲前鋒冒雨拔柵以發擊守碉賊盡殲四十年閏十月擊賊阿穆曲磨士卒倚柵射賊中槍死金川平科瑪佛倫泰達蘭泰薩爾吉岱並圖形紫光閣列前五十功臣

常祿保赫舍哩氏滿州鑲藍旗人其先有德祿者以軍功予騎尉世職常祿保襲職自三等侍衛屢遷四川提標左營遊擊從征金川擢成都城守營參將副都統海蘭察等攻得拉密色欽山梁賊潛伏林內常祿保往來搜擊進攻明郭宗取旁近山梁師進攻路頂宗所屬喀木色爾寨常祿保從海蘭察自南山大澗滑越山頂克之復進取博爾根山仰攻克木城受石傷溫福等上其功賜孔雀翎又從副都統阿爾素納等分路進攻昔嶺大碉賊百餘從旁衝出常祿保督兵橫擊敗之進駐日龍旋擢甘肅河州協副將定西將軍阿桂等攻克羅博瓦常祿保駐山巔賊九百餘乘雪夜分兩隊劫營四面環攻勢甚迫常祿保督

兵力戰禦之被鎗石傷賊竄入卡內者皆殲焉副都統烏什哈達等先後赴援常祿保督兵夾攻賊敗竄賜號西爾努恩巴圖魯白金百尋擢廣東高廉鎮總兵分攻舊則大海諸碉賊掘濠排松箴鹿角備禦甚嚴常祿保分兵出賊後合攻各碉卡同時皆下又偕總兵官達色合攻雅木則碉克之三十八年十一月師攻科布曲山梁賊死拒鎗石交下常祿保被創歿於陣事平祿死事諸將圖形紫光閣功稍次者爲後五十功臣常祿保及侍衛瑪爾占庫勒德穆哈納參將國興佐領巴西薩皆與焉瑪爾占巴爾汗氏察哈爾正自旗人自準噶爾來降以三等侍衛從軍攻日旁馬蹶傷仍請從軍擢二等侍衛命創愈仍從軍攻凱立葉力戰賜號拉布巴爾巴圖魯通頭等侍衛授領隊大臣攻克該布達什諾木城及色溯普前碉先登又被創予副都統銜三十九年攻康薩爾大碉戰沒庫勒德沃埒氏滿洲正藍旗人以藍翎侍衛從軍攻昔嶺及達扎克角木柵累遷二等侍衛攻克默格爾山梁賜號朗親巴圖魯攻邁克爾宗康薩爾被創四十年四月攻木思工噶戰死穆哈納瓜爾佳氏以護軍校從軍攻克默格爾

山梁及凱立葉碉寨遷三等侍衛攻木思工噶克了口直前奪其碉賊潰攻巴木通正濃霧督兵分道擊賊賊伏深箐中皆殲焉盡克其碉卡賜號巴爾丹巴圖魯四十年八月攻勒烏圍力戰死國興貴州大定人以千總從貴州威甯鎮總兵王萬邦征金川攻巴朗拉溫福疏言貴州綠營將士功多攻賚北山興爲前鋒進攻墨壘溝甲爾木再進攻東瑪我師爲木卡興將三百人爲守賊夜至興滅火以待賊逼卡發槍礮賊盡殲又從阿桂攻勒烏圍賜孔雀翎號圖多布巴圖魯累遷朗洞營參將四十年四月攻木思工噶克興持斧斫木城率衆擁入克其碉賊來攻興督兵射賊賊散復聚者七卒不能陷興負創越日卒巴西薩布拉穆氏索倫正紅旗人以佐領從軍攻羅博瓦山山甚峻巴西薩督兵攀登射賊殲遂取山梁諸碉卡皆下賜孔雀翎號塔爾濟巴圖魯四十年攻康薩爾攻碉迫懸崖賊無路殊死戰巴西薩死焉

札拉豐阿赫舍里氏滿洲正黃旗人前鋒統領定壽孫襲二等輕車都尉授三等侍衛累遷御前侍衛從討霍集占師次湯阿里克札拉豐阿將五百人捉生

俘三十餘師還賜西朗阿巴圖魯名號進一等輕車都尉圖形紫光閣擢正白
旗漢軍副都統出爲烏里雅蘇台參贊大臣旋令赴科布多經理屯田定邊左
副將軍成衮札布入覲令署將軍印召還京以正白旗護軍統領從明瑞出師
授領隊大臣次疊結戰破賊加都統銜賊圖小猛育中槍死益昭節進封一等
男子春甯襲爵官至綏遠城將軍觀音保瓜爾佳氏滿洲正黃旗人初授健銳
營前鋒藍翎長再遷前鋒參領從副將軍兆惠戰濟爾哈朗從參贊大臣雅爾
哈善攻庫車戰甚力擢正白旗蒙古副都子騎都統尉世職圖形紫光閣出爲
伊犁領隊大臣從明瑞攻烏什負創奮進克其城賜錫卓里克圖巴圖魯名號
遷鑲藍旗護軍統領署雲南楚雄鎮總兵從明瑞出師爲領隊大臣戰於疊結
日昧大霧賊出林中札拉豐阿率衆游賊壘觀音保當賊衝殺賊二百餘乘霧
深入破木砦師至小猛育賊聞急觀音保發數矢輒殲賊船僅餘一矢欲復射
驟策馬向草深處以其鐵射喉死予二等輕車都尉李全山西陽曲人自行伍
拔山西撫標把總累遷雲南永昌鎮總兵從征戰疊結與札拉豐阿據東山聚

張倚角破象陳至天生橋乘霧破賊壘至蠻化賊大至中槍數日卒王玉廷甘肅武威人自行伍累遷雲南臨元鎮總兵從征攻老官屯賊據木城拒守玉廷親發砲乘霧督攻中槍傷股戰益力賊敗匿不出復自力督戰創發卒諡勳義玉廷初從討達瓦齊援將軍兆惠黑水營之圍佐雅爾哈善圍庫車又從兆惠攻喀什噶爾皆有戰功至是與全同子騎都尉又一雲騎尉世職珠魯訥那爾氏滿洲鎮白旗人繙譯舉人授筆帖式充軍機處章京再遷戶部顏料庫員外郎出爲荊州副都統入授禮部侍郎調工部兼署兵部明瑞山師授參贊大臣駐雅爾移軍木邦土司變圍降請於清水河招商復業遣兵監焉擺夷猴歇等五十輩僞降斬以徇奏設木邦至阿瓦臺站凡五分兵防衛上嘉之繙甸兵自東西二山來犯遣裨將分禦俄賊焚游擊福珠營夜圍珠魯訥珠魯訥具遺奏遣筆帖式福祿突圍出遂自戕上責珠魯訥怯懦以其情亦可愍賜祭塋祀昭忠祠

許世亨四川新都人先世出回部初爲騎兵從征金川西藏並有勞旋以武舉

授把總累遷守備復從征金川從四川總督阿爾泰攻約咱東西山梁進攻扎口阿仰格藏達烏諸地連拔碉寨復攻甲爾木山梁及岳魯登達諸地拔木城石卡又克多功山坡及日本城碉寨進擊古魯碉賊夜劫營世亨率兵百餘禦戰至曙度賊且去開壁奮呼追擊殺賊無算遂克古魯碉寨賜孔雀翎加勁勳巴圖魯尋累擢參將從參贊大臣副都統明亮攻富噶拉山梁拔第五碉又從參贊大臣富德自墨壘溝進兵克甲爾木日赤爾丹思僧格宗諸寨又從定邊將軍明亮自底旺至馬奈克拉克紮絨布根扎葛木卡卡角思底喀咱普諸碉寨又從明亮自宜喜攻達爾圖山梁擒頭人丹巴阿太奪俄坡木克什格木勺洛諸碉卡又從領隊大臣奎林攻木克什西南山寨又從副都統三寶攻西郭洛進駐得爾巴克山梁又從明亮攻得楞山梁拔數碉進擊基本及思丹富噶薩谷諸山梁燬其碉俘敵無算克額爾替第一碉殺賊四十餘又克第二碉又克石真噶沙爾尼琅谷烏岳斯當安諸碉寨凡七戰皆勝進攻扎烏古時賊踞山巔碉卡連亘世亨冒石矢率兵直上拔數碉卡又克碾占山阿爾古山及平壩

諸寨又克達撒谷大山梁燬其碉寨又克獨古木上下寨進踞布吉魯達那兩道山梁又克甲雜官寨獨松隘口奪獲大小寨落數十並獲賊渠雍中旺爾結遂西至噶拉依與南路馬爾邦軍會四十一年金川平擢雲南騰越鎮總兵四十九年甘肅回亂世亨奉命往安定捕逸回獲二百餘事竣補貴州威甯鎮總兵五十二年臺灣林爽文叛世亨率黔兵二千餘赴勦攻克集集堡俘斬甚衆獲偽印器械旗幟進攻小牛天賊奔潰追襲至老衢崎俘爽文並頭人何有志又從參贊成都將軍鄂輝自大武隴進攻南路水底蓉手殺頭人一時莊大田等敗竄瑯嶠衆尙數千世亨率黔兵與諸軍分隊水陸合攻擒大田並諸賊目臺灣平改賜堅勇巴圖魯名號圖形紫光閣列前二十功臣五十三年二月擢浙江提督未至調廣西提督安南有大酋曰阮惠攻其國都逐其君黎維那兩廣總督孫士毅主用兵世亨諫不聽帥行將兩廣綠旗兵八千人與總兵尙維昇張朝龍等從出關入安南境至其國都有大川三北曰壽昌江南曰市球江又南曰富良江十一月辛未師渡壽昌江甲戌師次市球江惠兵據南岸山守

甚固朝龍兵自上游渡世亨亦力戰殺賊數千賜御用玉搬指小荷包越三日丁丑黎明師次富良江南岸卽黎城黎城者安南國都以王姓名其城也惠兵盡伐濱江竹木斂舟泊對岸循江岸得小舟載兵百餘夜分至江心奪惠軍舟世亨等親率二百餘人先渡復掠小舟三十餘更番渡兵分擄惠軍惠軍潰焚其舟十餘俘其將數十戊寅旦師畢濟黎氏宗族及安南民出迎世亨從士毅入城安撫求維祈承制立爲王捷聞封一等子疏辭弗許阮惠有分地曰廣南去黎城二千餘里方議進討請益兵籌餼上欲罷兵世亨亦謂士毅曰我兵深入重地惠未戰遽退事叵測及時振旅入關上計也士毅不納五十四年正月戊午朔士毅召諸將置酒高會己未維祁告惠兵至士毅蒼皇奪圍出渡富良江浮橋斷世亨與維昇朝龍率數百人戰橋南陣沒士毅初奏言惠兵至臣與世亨督兵決戰賊衆圍合臣與世亨不相見乃奪圍出上猶冀世亨全師而還既聞其戰死命予卹副將慶成自軍中還見上言當惠兵攻黎城士毅與世亨退據富良江拒惠士毅欲渡江與惠戰不利以身殉世亨力諫以大臣繫國重輕不可輕入令慶成護士毅還師又命千總薛忠挽士毅馬以退世亨督諸

將渡江陷陳力戰死上愍世亨知大體進封三等壯烈伯祀昭忠祠諡昭毅福
康安師至惠更名光平乞降立祠黎城祀死事諸將世亨居首列子文謨自武
舉襲爵命在頭等侍衛上行走期滿以湖廣參將用並賜孔雀翎嘉慶元年枝
江教匪聶人傑爲亂湖北巡撫惠齡令文謨捕治有勞賜繼勇巴圖魯名號擢
副將賊黨鄧之學詐降調知之俟其入壘將半文謨突起擒斬從總兵慶溥防
賊黃柏山又從副都統德楞泰擊冉文儔等大神山邊四川建昌鎮總兵又與
總兵德齡副將褚大榮擊賊陳家場德齡戰敗文謨馳救殺賊二百餘又戰大
竹梁山忠州屢敗賊擒其渠陳隴光等四十餘防嘉陵江遇賊不令渡加提督
銜復督兵捕治川北餘匪擢廣東提督尋調福建水師提督海盜蔡牽爲亂文
謨渡海討之並焚燬竹園尾太史宮莊諸賊巢再調浙江提督卒諡壯勇尙維
昇漢軍鑲藍旗人平南王可喜四世孫自官學生授鑾儀衛整儀尉五遷廣西
右江鎮總兵五十三年隨兩廣總督孫士毅出師十一月辛未維昇與副將慶

成以兵千餘至壽昌江阮惠軍保南岸我兵乘之浮橋斷皆超筏直上惠軍霧
中自相格殺我任遂盡渡大破賊渡市球江乘筏奪橋奮勇直進賜孔雀翎渡
富良江斬獲甚衆從士殺入黎城士殺敗退維昇戰死諡直烈張朝龍山西大
同人寄籍貴州以馬兵從征緬甸戰老官屯鎗傷左額又從征金川攻阿喀爾
布里布朗郭宗又從參贊大臣海蘭察自大板昭進勦克喇穆喇穆色溯普朝
龍先登攻邁克爾宗復先登被槍傷攻康薩爾山戰勒吉爾博攻達佳布喀吉
皆有功又從攻勒烏圍克之賜藍翎攻西里阿稽曲克木城十餘又攻雅瑪朋
格隆古索隆古諸地碉寨克之金川平叙功賜孔雀翎累擢廣東撫標中軍參
將五十二年臺灣林爽文爲亂朝龍率廣東兵進勦多所斬獲賜誠勇巴圖魯
名號進攻大里杙鎗傷右肩爽文就擒朝龍復與諸軍合攻莊大田于鄧嶺擒
之臺灣平圖形紫光閣列後三十功臣擢福建南澳鎮總兵五十三年從討安
南師渡壽昌江朝龍以別軍破阮惠軍於柱石進臨市球江江寬南岸羣山綿
亘惠軍據險列礮我師不能結筏諸將督兵陽運竹木造浮橋示且渡而朝龍

以兵二千循上游二十里求得流緩處小舟宵濟諸將乘筏薄南岸方與惠軍相持朝龍自上游繞出惠軍後乘高下擊惠軍潰復進薄富良江奪艦渡河入黎城士毅敗退朝龍戰死諡壯果李化龍山東齊東人自武進士授藍翎侍衛擢貴州銅仁協都司從大學士傅恒討緬甸師次老官屯化龍以大礮殺賊又從將軍溫福討金川克固卜濟瑪爾迪克諸碉卡嗣進攻路頂宗明郭宗等處化龍皆力戰有功明年三月師次昔嶺化龍射賊渠殪征小金川克阿爾克布里別斯滿諸地從都統海蘭察克兜烏山梁復連克路頂宗明郭宗諸地旋收美諾征大金川從海蘭察攻克喇穆喇穆諸地被石傷賜綿甲先後攻克邊克爾宗格魯古羣尼木思工噶克諸地山梁被槍傷賜孔雀翎金川平累遷廣東左翼總兵林爽文爲亂率廣東兵赴勦至鹿仔港總兵普吉保令化龍留守爽文攻諸羅急化龍密令游擊穆騰額率兵自番仔溝至不肚溪爲疑兵而親率游擊起斐熬等自八卦山抵柴坑賊聚拒化龍督兵力戰賊潰五十三年從討安南師渡市球江阮惠軍拒戰化龍督兵發礮擊賊造浮橋與張朝龍等率兵

徑渡入黎城士殺敗退至市球江令化龍先渡度浮橋落水死邢敦行直隸安
州人乾隆四十三年一甲一名進士白頭等侍衛累遷廣東三江口協副將阮
惠攻黎城戰死敦行事母孝將出戰解衣付其僕使歸告母子卹維昇朝龍三
等輕車都尉化龍敦行騎都尉諸神祠同時死者二十一人師還經富良江惠
軍追至戰死者九人又有參將鄧永亮都司盧文魁以出師時戰死

台斐英阿庫雅拉氏滿洲正白旗人自護軍補司嚮長授乾清門藍翎侍衛乾
隆三十九年從征金川命爲領隊與內大臣海蘭察等攻喇嘛山梁破碉
燬木城復循山梁逐賊至其麓進攻該布達什諾奪賊碉再進圍邊克爾宗燬
碉二百餘再進克默格爾以西及凱立葉前山梁諸碉卡擻三等侍衛復自羅
卜克鄂博踰溝攻格魯克古了口破沙木拉渠革什式圖諸寨復從領隊大臣
福康安攻勒吉爾博山脊克兩碉進攻薩克薩谷山梁及舍圖柱卡再進攻克
覺拉喇嘛寺及所屬卦爾沙巴等寨賜號拉布凱巴圖魯又偕海蘭察攻章噴
山峯進攻托古魯潛師自山嶺涉險攀援而上盡破之再進遂克勒烏圖師自

達烏達圍攻達思里海蘭察分兵七隊台斐英阿領其一自懸崖下夜半抵達烏達圍奪碉一及旦至當噶克底乘霧薄圍賊衆皆就戮從攻阿穆曲克大碉木城各二進攻奔魯木山峰連克舍勒固租魯瓦喇占薩爾克爾古什拉斯等諸寨又從福康安攻雍中喇嘛寺盡降其喇嘛擢二等待衛金川平圖形紫光開列前五十功臣四十六年從剿撒拉爾叛回敗賊龍尾山梁登華林山殲賊無算賊平擢頭等待衛從勦甘肅石峯堡叛回以功加副都統銜補公中佐領擢御前侍衛旋授正藍旗滿洲副都統擢正紅旗護軍統領調鎮黃旗五十六年征廓爾喀從福康安分攻擦木克之進攻濟噶率索倫勁騎衝擊轉戰至東覺山克賊寨十一殲殪賊目二俘七十有六加都統銜授散秩大臣進逼甲爾古拉山賊三道來犯台斐英阿射斃紅衣賊目二突中槍卒於陣諡吳肅賜白金千兩爾喀平再圖形紫光開列前十五功臣予騎都尉又一雲騎尉世職阿滿泰郭佳氏滿洲正白旗人本黑龍江達呼爾披甲從征回疆攻喀什噶爾城逐賊自阿拉楚爾至巴達克山獲其渠令入旗充護軍三十八年授藍翎侍衛

從征金川攻當噶爾拉山梁賊自庚額特山出阿滿泰與前鋒參領巴克坦布
據險要殲賊攻達爾旺山梁克之攻格木勺截甲索賊來路與侍衛阿爾保等
攻科拉木達撲調勝援賊擄三等侍衛賜號扎努恩巴圖魯攻扎烏孤山梁加
雜肚絨布巴魯担諸處皆有功金川平圖形紫光閣列後五十功臣擢副謏軍
參領蘭州回爲亂從軍攻華林山燬賊百餘身被創擢護軍參領攻石峰堡偵
賊底店奪卡擄頭等侍衛從征廓爾喀自中路被撥木隘口出濟曬破其官寨
進破賊熟索橋渡河至雅爾登登博爾東拉山巔破木城三石卡七授鑲紅旗
蒙古副都統進至堆補木自帕朗古攻橫河大橋我師臨北岸賊據南岸禦阿
滿泰先登師從之度橋阿滿泰中槍落水死水深戰方急求其尸不可得賜騎
都尉世職祀昭忠祠廓爾喀平再圖形紫光閣列前十五功臣

花連布額爾德特氏蒙古鑲黃旗人性質直少讀書習論語左傳充健銳營前
鋒累遷火器營委署烏鎗護軍參領以參將發湖廣授武昌城守營參將累遷
貴州南籠鎮總兵乾隆六十年福康安征貴州亂苗令將精兵三千爲前驅通

松桃銅仁兩路餽道援永綏釋正大營圍賜孔雀翎軍自啞喇塘經阿寨營安
靜關轉戰而入經巖板橋收諸碉寨又經上下麻洲高陂塘上下長坪自嗅腦
至松桃平綠道苗卡埋坑谷過大軍上以花連布奮勇賜號剛安巴圖魯賚白
金百又戰卡落塘擊梁帽寨且戰且前時永綏被圍已八十餘日花連布軍至
方戰圍始解苗皆烏合未見大敵相驚爲神兵花連布著豹皮戰裙督戰因呼
爲花老虎又擊賊小排吾攻巴茅汛鴨酉黃瓜諸寨自滾牛坡循崖下攻臘夷
寨槍傷左腋上手詔獎其勇問創已愈未復自葫蘆坪攻克黨壩三家廟諸寨
焚上下竹排再進破箐子坳屯軍古哨營小梁上錄花連布功授貴州提督福
康安軍至令結壘大營前悉以兵事屬之日置酒高會苗詞知福康安持重不
戰一日數至花連布力禦之晝夜徼循苗屢敗頗畏懼福康安益易視之苗益
掠焚無忌頭人吳半生集羣苗拒戰花連布與額勒登保會總兵那丹珠等合
軍攻爆木林克苗寨十餘深入自成光寨至上下狗腦坡山峻險冒矢石援藤
葛直陟山巔苗漸卻分兵下攻福康安焚附坡諸苗寨花連布督兵伐竹木熏

空大小巖洞死者枕藉又自貓頭進克茶林碉上下麻衝諸寨下黃毛山坡遇苗兵數千額勒登保迎戰花連布出賊後夾擊大破之再進克馬腦猪革殺苗坪竹子諸寨分兵攻巖板井讓水沱溪頭綠樹衝關鎮坪諸隘皆下吳牛生亡匪高多寨與諸軍分道入環攻之生得牛生又有頭人吳八月據平隴自稱吳三桂後糾黨轉盛福康安令花連布引兵攻鵝洛等二十四寨皆下進攻龍角峒奮戰自辰至酉乃克之附近諸苗寨皆降又克大坡腦等三十餘卡攻鴨保去平隴七十里時已昏風大作山木動搖崖高溝窄花連布督兵攀越縱火痛擊破木城七石卡五旁收垂藤董羅諸寨遂禽八月其子廷禮廷義猶據險乘勝克大中大三天星寨再進取黃衝口等十三寨得盤木管兩山梁歲霖雨雪進圍地良坡收八荆桃花諸寨轉戰經連雲山猴子山蛇退嶺壁多山高吉陀下貴道嶺等四十餘卡抵長吉山圍石城未至平隴三十里所詔責復乾州廳時福康安感瘴卒和琳代將令花連布率兵攻全壁嶺自馬鞍山入山葭廳城下瞰大河將濟懼苗涉水相襲花連布分兵勦旁近諸寨翼大軍遂復乾州會

和琳亦卒上諭湖南巡撫姜晟以軍事諮花連布貴州清溪民高承德以邪術糾衆爲亂戕縣吏花連布督軍捕治克槐花坪四寨進攻小竹山破其寨燬承德及戕縣吏賊再進攻大小鬼出戮餘賊嘉慶元年九月丁卯日加已賊攻夏家衝花連布令副將海格參將施縉張兩翼擊賊賊數千拒戰花連布出其中逐賊賊見攻急據坡擲石花連布方上坡中石自巖墮深澗罵賊賊欲鈎出之自力轉入巖下頸折死諸將爭殺賊賊卻出花連布尸顛骨寸寸折失一臂上愍其死事烈加太子少保賜騎都尉兼雲騎尉世職賚白金八百諡壯節明安圖博爾濟吉特氏蒙古正紅旗人以雲騎尉授三等侍衛累遷湖南保靖營游擊從征金川大小戰五十有四叙功累遷鎮鎮總兵貴州湖北苗石柳鄧石三保等糾衆爲亂明安圖督兵禦戰永綏協副將伊薩納赴援同戰死苗攻滾牛坡劫我軍饋餉雲南鶴麗鎮中軍游擊永舒四川阜和協左營都司班第共擊之沒於陳

論曰師再征金川歷四年大小數百戰將士夷傷衆矣全順等平時力戰功最

死事尤虞虞扎拉豐阿等死緬甸與明瑞並烈世亨等死安南以全孫士毅賞尤厚台斐英阿死廓爾喀福康安因以受降還師花連布善戰死不欲爲羣苗得糜軀矢節其狀視諸死事者尤慘烈矣哉

清史稿

列傳一百二十二

富僧阿

伊勒圖

胡貴

俞金鼈

剛塔

富僧阿舒穆祿氏滿洲正黃旗人雍正初授拜唐阿累遷頭等侍衛出爲副都統歷成都三姓寧古塔諸地擢將軍自荊州移黑龍江黑龍江北鄰俄羅斯康熙二十九年與定界歲久將吏憚行邊道里不能詳富僧阿遣副都統瑚爾起等分探諸水源皆至興堪山還報乃上疏言副都統瑚爾起探格爾畢齊河源自黑龍江至格爾畢齊河口水程一千六百九十七里自河口行陸路二百四十七里至興堪山其間無人迹協領納林布探精奇哩江源自黑龍江入精奇哩江北行至托克河口水程一千五百八十七里自河口行陸路二百四十里至興堪山地苦寒無水草禽獸協領偉保探西里木第河源自黑龍江經精奇哩江入西里木第河口復過英肯河水程一千三百五里自英肯河口行陸路

一百八十里至興堪山地苦寒無水草禽獸協領阿迪木保探鈕曼河源自黑龍江入鉏曼河復經西里木第河入烏默勒河口水程一千六百十五里自河口行陸路四百五十六里至興堪山諸地俱無俄羅斯偷越臣按呼倫貝爾有額爾古納河西爲俄羅斯界東屬我國自此至珠爾特處處設卡今復自珠爾特至莫哩勒克河口設卡二索博爾罕增立鄂博逐日巡查俄羅斯爾瑪爾斷難偷越黑龍江與俄羅斯接壤興堪山延亘至海爾後請飭打牲總管每歲六月遣章京驍騎校兵丁自水路與捕貂人同至托克英肯兩河口及鄂勒希西里木第兩河間巡察還報三年遣副總管佐領驍騎校於冰解後自水路至興堪山巡察還報黑龍江官兵每歲巡察格爾畢齊河口三年亦至興堪山巡察還報歲終報部上從之富竹阿治事嚴密疏請罪人予官兵爲奴并其妻子皆令爲奴又以遣犯脫走出巡並將校婪索皆請逮送刑部上不許移西安將軍西安甯夏移駐滿洲兵復分駐巴里坤富僧阿讓定規制皆如所請乾隆四十年三月卒官

伊勒圖納喇氏滿洲正白旗人乾隆初以世管佐領授三等侍衛累遷鑲紅旗蒙古副都統出駐烏魯木齊移阿克蘇三十二年授伊犁參贊大臣移喀什噶爾內擢理藩院尚書外授伊犁將軍三十四年師征緬甸授副將軍從經略大學士傅恒分道進軍緬甸人拒曼鳩江築寨伊勒圖偕參贊大臣阿里袞與戰奪寨三殺賊五千餘師還授兵部尚書復外授伊犁將軍土爾扈特汗渥巴錫台吉策伯克多爾濟等率所部三萬餘戶來歸先期使至伊犁具書通款伊勒圖以聞高宗命加意撫綏俾得所於是土爾扈特部悉內附哈薩克布魯特兩部厄魯特降者日衆伊勒圖請增置佐領俾領其衆從之三十六年左授參贊大臣駐烏什移塔爾巴哈台三十八年復授伊犁將軍兵部議禁烏鎗伊勒圖以上爾扈特部新歸附牧馬禦豺虎恃烏鎗不當一體收禁四十八年加太子太保賜雙眼花翎五十年七月卒諡襄武封一等伯祀賢良祠發帑金千遺侍衛豐仲濟倫如伊犁賜奠伊勒圖在邊二十餘年諸所經畫縝密垂久遠其在塔爾巴哈台受代去上諭繼任參贊大臣慶桂循其規制鎮伊犁尤久伊犁屯

田請兵得携妻子於塔爾奇溝口外烏可爾博蘇克東察罕烏蘇雀爾果斯巴彥借諸地築城堡水足地厚俾得久屯設寶伊局鑄錢採哈爾哈圖銅鑛三年得九千餘斤令加鑄於烏什鑄普爾烏什及庫車哈喇沙爾諸城與伊犁錢並用普爾回錢名也又於崆郭羅鄂博諸地採煤聽商人充窰戶徵其稅都統海祿請令遣犯皆入鐵廠與罪人畀官兵爲奴者同例伊勒圖請仍如舊制使遣犯與爲奴者有別其卒上稱其鎮靜妥協各部落皆心服封卹特厚

胡貴字爾恒福建同安人少有智略入伍稍遷水師提標右營千總雍正六年齋奏入都世宗召入見再遷後營游擊監修戰艦出巡海坐誤工吏議當左授上特宥之累遷江南蘇松鎮總兵督運漕糧十萬轉海賑福建道溫州鳳凰洋颯作損米五百餘請出私財以償高宗諭曰冒險已可嘉豈有復令出私財償米之理命罷勿償旋坐廢弛當奪職復特宥之疏言本鎮春秋兩哨中營游擊司糧餼奇兵營游擊職城守例不出巡惟旣任水師當知海道應從衆出巡陸路將士願改水師者先令出海演試如有贖略量爲改補並從所請崇明海疆

沒民廬召縣吏議賑吏言當待請貴曰民死在頃刻豈能俟報有譴吾任之卽發倉以賑令所屬爲助衆有難色貴曰設官非以衛民乎賑不周生它變豈能免患疏請發帑金十八萬倉穀二十八萬並留漕米續賑上深嘉之歷廣東潮州瓊州諸鎮擢提督增城民王亮臣爲亂貴勅兵馳赴分遣所屬防隘扼賊走路總督阿里袞軍亦至分道捕治諸賊皆就禽以失察自劾貸勿問仍叙勞入覲賜花翎移福建水師提督復自浙江還廣東二十五年卒諡勤愍子振聲附李長庚傳

俞金鼈字厚菴直隸天津人乾隆七年武進十授藍翎侍衛以守備發山東累遷甘肅肅州鎮總兵命如伊犁董理屯田歲豐伊犁將軍伊勒圖奏緣營兵二千二百名人糶米二十八石有奇得旨叙勞移巴里坤總兵擢烏魯木齊提督仍領屯田事奏請移沙州副將駐安西巴里坤迤西至瑪納斯擇有水草地設墩塘皆議行時令移軍成烏魯木齊及瑪納斯得挈妻子以往謂之眷兵金鼈請具一歲糧亦從其請歷江南福建陸路甘肅諸省固原回李化玉與河州回

田五糾衆爲亂攻靖遠金鼈與涼州副都統圖桑阿合軍討之遂賊馬營街固原提督剛塔亦以師來會多所斬獲土司楊金業以土兵助戰賊憑山設拒土兵敗走金鼈擊賊退夜走石峯堡糾會甯諸回勢復張副都統明善戰死金鼈進次烏家坪擊賊斃頭人三禽二十有九轉戰至秦安土鼓山賊敗竄蓮花城師從之至於雙岷從總督李侍堯自中路進攻敗之福康安督兵剿石峯堡令金鼈防底店護歸道回亂定移湖廣復移直隸未行鳳凰廳苗石滿宜糾衆爲亂金鼈聞報馳赴令鎮守鎮總兵尹德禧督軍破賊寨生致其渠上以金鼈習苗疆事命仍留湖廣尋灣林爽文爲亂命德禧將湖北兵二千以往金鼈出駐鳳凰廳鎮苗疆旋入覲命在乾清門行走賜紫禁城騎馬引疾乞罷上以金鼈有勞下總督畢沅察病狀乃加左都督允解官歸旋卒金鼈管預千叟宴高宗賜之酒命賦詩紀事金鼈辭不能詩上顧笑曰汝爲香樹妻弟又從受業豈不能詩者香樹錢陳羣字也官湖廣和珅已柄政欲納交焉金鼈謝不可尹德禧鑲黃旗包衣人初名色喀通額以領催從征伊犁遷至防禦開戶出旗更姓名

改稱直隸密雲縣從征金川復六遷至總兵石滿宜據句捕若爲亂德禱破若
獲滿宜賜花翎上誥德禱當苗亂何不專摺奏德禱請罪命貸之搜捕滿宜餘
黨苗疆悉定其出師臺灣師至爽文已就俘福康安令德禱屯竹仔港防賊逸
臺灣定召入見令署湖南提督卒遺言請還旗籍復隸銀黃旗包衣

剛塔烏濟克忒氏滿洲正藍旗人初充前鋒從征準噶爾授雲騎尉世職三遷
直隸秦甯鎮中營游擊從克臨清山東巡撫楊景素奏留山東四遷直隸提督
兼領馬蘭鎮總兵移陝西固原提督乾隆四十九年鹽茶廳小山回田五糾衆
爲亂攻破安西州剛塔督兵逐賊殺賊數十射殪乘馬賊渠賜上用玉韞大小
荷包復逐賊至浪山田五戰被創自殺其徒竄據馬家堡剛塔督兵合圍賊夜
出堡踰山遁環壘樹木桿懸衣帽其上給官軍官軍逼壘乃知賊已走剛塔督
兵逐賊戰於馬家灣剛塔中矢復進至馬營街殺賊數十得級二十五賊攻陷
通渭其徒分據石峯堡西安副都統明善攻之沒於陳上以師無功令大學士
阿桂尙書福康安出視師上謂馬營街石峯堡皆通渭地剛塔方逐賊馬營街

通渭陷不赴援明善又以攻石峯堡戰死詔詰賈剛塔疏言獲賊言將自通渭道伏羌秦州攻瀋關上賈剛塔信賊妄語搖軍心令福康安傳諭奪剛塔職速送京師上方幸熱河留京王大臣等讞富斬上以剛塔殲賊渠田五戰馬家灣身被創貨死戍伊犁卒

諭曰富僧阿鎮黑龍江察國界定巡徼之制伊勒圖鎮伊犁徠風部著拊循之績建威銷萌邊帥之職舉矣貴定增城金鼈剛塔攻石峯堡名位顯晦殊要不
可謂無功也故類次焉

清史稿

列傳一百二十三

葉士寬

懷步

介錫周

方浩

金溶

張維寅

顧光旭

沈善富

方昂

唐侍陞

張冲之

葉士寬字映庭江蘇吳縣人康熙五十九年舉人授山西定襄知縣求民隱濬煩苛不假胥吏事辦而民不擾雍正八年擢沁州知州署潞安知府除無名諸稅復四門集以便商民歷署平陽太原治行爲山西最十二年舉卓異擢浙江紹興知府有惰民格殺士人衆譁將罷試士寬方勘三江間馳歸數言諭解之風潮陷海塘躬任堵築三月而工完乾隆初調金華東陽饑民求賑者以萬計士寬曰按冊施賑是賑冊非賑民也乃召饑者前注名於冊而斥二人衆乃定二人者一婦人曾以訟至官服華服至是易敝衣乞賑士寬識之令褫其敝衣

內華服如故一男子容甚澤令飲雞莢汁嘔出酒肉衆驚服賑者潛散去在金華三年多善政郡人爲立生祠擢杭嘉湖道調金衢嚴道衢州地高西安龍游諸縣素突塢蓄水溉田木商入山者私開塢水日涸士寬嚴禁之民皆稱便八年調寧紹台道紹興大水蕭山諸暨民多挾衆詣縣求食巡撫惡之不欲賑士寬曰某來時民饑幾欲死何忍坐視其悉填溝壑耶繼以泣請乃得上聞給賑士寬以待饑而賑常不及議浙紹興之鑑湖甯波之廣惠湖會去官未果著浙東水利書冀後有行之者父憂歸遂不出陳夢說字曉巖山西絳縣人乾隆十三年進士授刑部主事讞決執法不阿上官兼提牢役不能爲奸累遷禮部郎中出爲浙江甯紹台道台州素曠悍甯海梅村民拒捕提督將以兵往旁村皆驚竄夢說輕騎臨縣縣令已縲繫竄者數十人盡釋之曰吾來捕梅姓數人而已獲誅拒捕者而釋其少子一人台人感之謠其事爲存孤記修鄞縣錢湖插值上南巡召見素知其刑部有能名賜綺貂尋以失察屬吏不職罪議仍以道員用授督糧道却餽金漕政肅然時訛言妖人翦髮蕭山捕僧了凡等四

人誣服夢說平反之後或言事由浙見解京訊治無驗抵妄捕者罪以夢說輕比降秩修餘杭南湖隄署嘉興嚴州處州湖州諸府復原官夢說官浙十二年所至有聲尋乞歸

介錫周字鼎卜山西解州人康熙六十年進士雍正初授貴州畢節知縣烏蒙土司叛督運軍糧遇逆苗徒役欲棄糧走錫周厲聲曰失糧法當死犯苗亦死死法毋甯死賊策馬徑前千夫擁糧而進逆苗哈愕烏獸散遂平遠知州烏蒙獠夷復叛川滇苗獠應之錫周先往撫大定苗平遠得無患十三年擢大定知府古州苗亂陷黃平清平驛路俱梗塘兵妄報土酋安國賢通古州苗剋期犯貴陽大吏發川兵將至國賢轄地九百里衆惶駭錫周甫蒞郡立召國賢至諭以禍福國賢伏地陳無交通古州狀錫周曰汝率衆苗就撫我以百口保汝不死且止川兵時丹江亦被圍乃請以川兵往援丹江圍解而大定安堵南籠民王祖先素無籍以書符惑衆播爲逆詞又粵西獠人王阿耳爲寨長王文甲所執竄入苗寨誣文甲將糾合册亨諸寨叛二獄同時起株連千餘人南籠獄不

能容滇粵錯壤秦苗多逃錫周奉檄往會鞠蔽罪悉當釋文甲及繫累者逃亡並歸邊境以靖攝貴東道筦糧運時軍興歲餽餉金二百四十餘萬兩米八十餘萬石調馬三千夫五千騾集鎮遠漫無紀夫糜廩食馬累里戶復於上游南籠諸府役民夫加運九站下游銅仁諸府則增雇調二千人助役錫周畫三策以馬設驛站運凱里丹江諸路夫按期日運台拱諸路楚粵米皆由水運分清江及古州都江兩路輓輸迅速糧乃集上游之加運下游之調夫皆止之省帑數十萬民間亦減勞費之累補貴西道調糧道兵米折色不收餘羨兵民交頌之乾隆中擢按察使錫周在黔中久吏治風土民苗疾苦皆孰習莅之以誠愼刑獄興教化性素耿介不諂於時以老乞休上念其勞勩召入覲授太僕寺少卿閱三年告歸

方浩字孟亭安徽桐城人雍正八年進士授山西太原知縣嘗知隰平定二州隰民有茹素號爲大乘教者浩召至庭嘆以酒肉人莫知其故其後逮捕大乘教人連數郡而隰民獨免平定旱奸民煽譁求糶捕渠魁一人置之法餘悉

不問遼瀋安知府會上西巡取道澤潞吏平道及道旁民田浩以饑與未出而民廢耕作非上愛民之意令耕如平時民得收穫而事亦治擢江西廣饒九南道按察副使兼攝九江府事歲旱米商未至他郡縣乏食大吏檄運倉糧往濟浩以郡民咸待食而移粟他往恐生事請獨輸九江倉而屬縣停運違大吏意未幾安仁以阻運成大獄大吏以此重浩旋調吉南嶺道奸民據險爲亂馳詣捕緝比大吏至謀主已就擒其敏捷如此坐事罷循例復職方需次吏部以疾卒

金溶字廣蘊順天大興人雍正八年進士以刑部員外郎擢山東道監察御史高宗卽位詔求直言溶上疏言安民五事一曰開墾之地緩其升科二曰帶徵之項宜加豁免三曰關稅正額之外免報盈餘四曰州縣殿最首重民事不以辦差爲能五曰巡狩之地崇尚樸素不以紛華取媚當是時上命翰詹科道各進經史摺子溶又上疏曰頭會箕歛以裕囊橐者匹夫之富也輕徭薄稅使四海咸甯者天子之富也易卦損下益上上益矣而反名損損上益下上損矣而

反名益蓋謂百姓足君孰與不足百姓不足君孰與足聖人制卦之意可深長思也乾隆九年湖廣總督孫嘉淦因徇巡撫許容奪職命修順義城濬上疏論曰賞罰者人主御世之大權臣工有罪有罰鍍一例因其素非廉吏使天下曉然知所得者終不能爲子孫計留也孫嘉淦操守不苟久在聖明洞鑒之中而罰令出貨効力恐天下督撫聞之謂以嘉淦之操守尙不免於議罰或一不得當而罰卽相隨勢必墮廉隅預爲受罰之地是罰行而貪風起不可不慎也臣爲嘉淦所取士不敢避師生之嫌而隱默不言奏上部議奪職未幾特起爲福建漳州知府漳俗強悍胥吏千餘交結大吏家奴勢力出長官上有吳成者設局誘博擒治之民稱快華葑村距縣治二百里康熙時嘗議設縣丞以不便於胥吏格不行濬復以請布政使文不下府而直行縣濬大怒嚴訊縣胥得其交通狀乃詳請治罪而設官其父老歎曰微金公吾儕奔馳道路死矣乾隆十三年春閩省旱斗米千錢大府檄濬平糶濬勸富家出糶給印紙令商人赴糶又請寬濬灣米入內地之禁民情帖然其他脩文廟樂器增書院燬火皆次第舉

行遷臺灣道補陝西鹽驛道署布按兩司事調浙江糧道與巡撫陳學鵬抵牾
學鵬論溶迂緩不任事原品休致卒年七十三

張維寅字子畏直隸南皮人乾隆元年進士授戶部江南司主事江南賦役甲
天下支銷留解端緒毛櫛維寅綜覈精密猾吏不能欺遷吏部員外郎考選監
察御史補掌貴州道劾奏閩督誘人受賂而坐之罪失政體上是之爲通行飭
戒簡雲南迤東道至改補驛鹽滇鹽無成法維寅一一調之使井官煎戶運夫
鋪商無偏累滇人稱便歲節縮歸公銀七千兩以前官累左遷知府於時東川
官設牛馬站通百色銅往鹽返謂可省費既奏行而路險阻車摧折牛馬多死
銅鹽耗失維寅奉勘得實以事不可已請夷路用車險雇夫役資出鎗息無溢
費且不擾民從之獲濟署鶴慶永北補臨安調首郡兼楚雄值地震爲災躬勘
鶴慶劍川浪穹麗江昌門賑活災氓每數萬計遷督糧道整頓銅廠代償前官
虧帑待罪得脫調浙江鹽道未數月調福建汀漳龍道閩俗獷悍痛懲以法擒
巨猾散黜黨健訟鬪狠之風爲息察冤決疑人稱神明舉卓異入覲上獎慰甚

至復之官病卒

顧光旭字晴沙江蘇無錫人乾隆十八年進士授戶部主事晉員外郎主鹽筴兩淮解銀輒挂欠百之十五光旭謂各省庫平皆部較頒何獨兩淮歷久如是是銀庫多索也白於長官除免之擢御史二十四年直隸山東大水次年春疏曰上年兩省災截漕發帑加賑近見流民扶老携幼入京春來尤甚五城米廠飯廠人倍增詢之近京數百里毀屋伐樹賣男鬻女老弱踣頓不可勝記耳目所及如此其外可知伏思救荒無奇策惟督撫及有司親民之官實心實力方克有濟各州縣未嘗不施賑或委任佐貳或假手胥吏或設廠遠離村鎮窮民奔走待食或得或不得良法美意一入俗吏之手沾實惠者十不及五一二賢有司撫循周至則他境流民聞風畢集轉難措手此督撫不能真實愛民下亦以應付塞責一切皆屬具文請勅下隨地撫綏無致流移失所疏導積水以工代賑借給牛種以資耕作有流民有曠土卽重治督撫州縣之罪來京饑民已領賑賑一年之計在於東作無力自回者給資遣送其本籍無倚賴者歸大興

宛平安輯勿令棲流無著又每遇水旱司道府親勘先以供應頴州縣所委佐
貳亦滋擾累請嚴參重處奏入上善之命赴京畿察勘疏消文安大城積水樂
亭民擁閤縣門撫定之馳章請加賑歷寶坻灤州盧龍兩月竣事遷給事中尋
出爲甘肅寧夏知府調平涼三十五年大旱請賑初爲上官所格光旭親察災
戶亟發銀米煮粥以賑隣縣饑者率就之時災黎鬻妻子道殣相望光旭巡視
山僻賦詩曰輪蹄烏道半腸路溝壑鳩形鵠面人又曰產破妻孥賤腸枯草木
甘誦者政動自夏至次年三月始雨平涼隆德固原靜甯各股粥廠二饑民日
增慮入夏疫作給每口兩月糧遣使歸耕時已擢涼莊道總督文綬任以河東
賑事一切錢糧聽支取知府以下聽調道分八路比戶清勘刊發三連票備考
覈發姦摘伏官吏傷息竟事無中飽民獲更生三十七年金川用兵文綬調四
川總督疏請光旭隨往司三路餽餉署按察使蜀民失業無賴者多習拳勇嗜
飲博浸至劫殺號爲囑嚙子至是益衆嚴捕治之改悔者發爲運丁頗收其用
以秋審失出罷職留治糧餉四十年金川平駐西路臥龍關經理凱旋兵十餘

萬帖然無擾事竣乞病歸年未五十里居遇災助賑一如在官時主東林書院數十年聚生徒講論道義繼其鄉願憲成高攀龍之緒著紫泉集

沈善富字既堂江蘇高郵人乾隆十九年進士選庶吉士授編修典江西山西鄉試權制誥辦院事纂修國史續文獻通考勤於其職出爲安徽太平知府在官十有六年尤盡心災賑三十四年大水坐泮盆經行村落得賑者五十萬口富塗官奸決密勸富家出糶禁轉掠使各村自保有告某家不糶者笞之曰汝奉何明令使富家出粟耶民乃定三十六年泗州水大吏檄善富往賑之釐戶口之弊民受其惠值大疫設局施藥施瘞絕軍祈禳前後課屬縣種柳數百萬株官路成陰埋暴露十餘萬棺時傳妖人割髮搜捕令下諸郡騷然獨太平不妄捕一人兄弟訟察其詞出一手杖主訟者兄弟悔悟如初師弟互許陰事取案前文卷盈尺火之曰爾詞必有稿可上控郡騷守焚案不汝斬兩造皆泣訟乃息貴池有爭地訟於部者視舊牘得成化二十年閏四月官契念愚民安知閏檢明史七卿表得是年閏四月文據以定讞四十六年擢河東鹽運使鹽池

受淡水歉產商運蒙古鹽多勞費及鹽產復盛弊多商困善富曰鹽池自古爲利不當廢革若聽民自販必致蒙鹽內侵商人之力不患寡患不均其弊有三奸商棄瘠據肥一也費浮地遠伏攬其利二也簽代之期貧富倒置三也乃總三省引地爲三等均之復以道路遠近順配爲五十六路闡分籤掣之於是路絕弊清後乾隆末廢商運蒙鹽果內侵至嘉慶十一年仍復舊制皆如所預計所至興學愛士人文蔚起以母老乞終養居鄉多善舉著銜味齋詩文字

方昂字坳堂山東歷城人乾隆三十六年進士授刑部主事累晉郎中會秋讞更新例凡金刃殺人概爲情實昂分別其輕重固爭不得後高宗特旨改正坐是爲同僚所忌淹滯十年又數上書與長官爭長官愠之卒重其人以薦出爲江西饒州知府安南阮光平入覲驛傳所經多飾供帳昂曰國家以威德服四夷非誇以旛屨戒所屬勿與擻江蘇蘇松道已受代將行營弁緝照波及良善衆洶洶不平營弁以民變告且徵兵昂曰新守與民未習民勿信自出曉諭捕倡首者置法申請上官褫營弁職事卽定至任有尼之者遂謝病去官病瘥復

出著松太道閩廣洋盜竄入吳淞總督巡撫提督會師於寶山昂建議曰衛山與大小羊山江浙之分界港汊叢雜盜船隨處可寄椗一得風潮之便倏忽出沒猝不及防當其乘風而來迎擊之時彼順而我逆及其趁潮而退追擊之則我後而彼先是使盜常憑勝勢也請於要隘多設伏俟其至則縱使過而躡其後遇其退則扼不使前以待後隊之追則盜黠無能爲也從其議盜果大摧補江甯鹽巡道緝訟師剔衙獄戢強暴弭盜賊尤以砥礪風俗爲先屏絕酬酢同官聞其風采咸重之嘉慶三年擢貴州按察使八閱月遷江甯布政使未久以病乞歸昂剛勁動職其結也上曰此人可惜尋卒

唐侍陸字贊寔江蘇江都人巡撫綏福孫乾隆中以廕生授南河山旴通判歷任宿虹銅浦裏河外河同知以治河績考最擢湖北鄖陽知府母憂去官四十七年服闋會河決清龍岡屢築屢圯大學士阿桂督治以侍陸習河事疏調赴工阿桂方與總河議改河之策決計於侍陸侍陸曰今全河下注非土埽所能當欲逆挽歸正道難矣但於南岸上游百里外開引河則不與急流爭其全勢

易掣以逸待勞此上策也於是定計開蘭陽引河至商邱歸正河以待陞總其事工成被詔嘉獎擢開歸道時新引河隄初成溜逼甚險復於儀封十六堡增開引河夏汛水至果分爲二派一由新引河一由儀封舊城之南達所增引河又於毛家寨增築月隄唯汛七堡建挑水壩水勢乃暢下無潰決五十三年署彰衛懷道泃河勢將有變請於銅瓦廂大隄後增築捍隄總河蘭錫第以無故興大工難之因請乃可次年夏銅瓦工內塌勢岌岌總河李奉錫新至視河曰奈何侍陞曰待其塌多必大決今當於隄之下口新築捍隄內掘開數丈使水迴溜而入入必淤淤則大隄捍隄合爲一河直注之力已殺隄乃可保從之隄合險平錫第曰君之出奇制勝者在前之預築捍隄也侍陞前官銅沛時亦用放淤平險之法又在宿虹時夏家馬路黃運交過裏河淤淺水將沒隄效黃河清水龍法疏其淤而隄安於徐州城外增築石工石磯嘴增爛石城乃無患衛河水弱清艘不利掘地引沁挾濟以助衝其應變弭患多類此嘗論治河之道曰河行挾沙治法宜激之使怒而直以暢其勢曲以殺其威無廢工而不可偏

無爭土而不可讓守此岸則慮彼岸治上游則慮下游世以爲名言尋補山東運河道調兌沂曹濟道以失察左遷遂乞病歸侍陞歷官皆有聲有功於河淮者爲多先是南汝光道張沖之亦以治河著沖之字道淵順天宛平人雍正初以諸生舉孝廉方正授工部主事遇事奮厲於總理果親王前持議無避忌各行省奏追虧帑積數千萬贖冗無實請分別覈免之尋以事被謫乾隆初復原官改刑部累遷戶部郎中治事平恕二十六年擢河南南汝光道是年秋河決楊橋大學士劉統勳兆惠奉命往塞之調沖之襄河事時徵糞粘價騰至一莖兩錢既大集河員猶以多備請官吏在事者羣附和之沖之曰計工需料若干萬今已贏矣災民搜括脂髓來供用忍復乘以爲利耶亟白使臣請及時權塞期以某日合龍當有餘料若干萬力持其議卒聽沖之減徵秫秸六千萬麻六百萬卽責沖之董其役果如期合龍仍有餘料殫數給還以紓民力巡撫胡寶瑤喜曰吾爲國家得一良總河矣在官三年治羅山獄活誣服者四人修城工務覈實有司不得緣爲益民德之以商城獄坐徇庇奪職効力軍臺逾年放歸

論曰諸道本以佐布政按察二使分領郡縣乾隆中罷參政參議副使僉事道始爲專官上寬等皆觥觥能舉其職侍陞尤以治河著觀其所設施益於國澤於民雖古循吏不是過也